
ФАРҒОНАДА ТОМЧИЛАТИБ СУҒОРИШ ЖИҲОЗЛАРИ ИШЛАБ ЧИҚАРИЛМОҚДА

Табиийки, аҳоли сони кўпайгани сари табиий ресурслар, айниқса, сувга бўлган талаб янада ошиб бормоқда. Шунинг учун олган ҳолда дунёнинг кўплаб давлатлари томонидан қишлоқ хўжалигида сув сарфини қисқартиришга қаратилган янги лойиҳалар жорий этиляпти. Улардан энг оммалашгани эса экинларни томчилатиб суғориш тизимидир.

Фарғона шаҳридаги Шухратжон Носиров номидаги кластер қошида ташкил этилган “Фергана агродроп” МЧЖ томонидан сув тежовчи технологияларни ишлаб чиқариш йўлга қўйилди. Корхонанинг лойиҳа қиймати 5 млрд.сўмни, йиллик қуввати 850 тонна шланг, 150 тонна труба ишлаб чиқаришни ташкил этади. 15 нафар мутахассисга иш ўрни яратилган.

Бугун, 12 сентябрь куни Фарғона вилояти ҳокими Шухрат Ғаниев ушбу корхонада бўлиб, янги технология линиялари билан яқиндан танишди. Унинг имкониятлари, истиқболлари, улардан самарали фойдаланиш йўллари ҳақида мутахассислар, фермерлар билан фикр алмашди.

- Томчилатиб суғориш жиҳозларини ишлаб чиқариш корхонасининг иш бошлаши шубҳасиз, мазкур йўналишдаги амалий қадамлардан бири бўлди, - деди вилоят ҳокими. – 2019 йилда 5,5 минг, 2021 йилда эса 30 минг гектар пахта, боғ шу технология асосида суғорилади.

Албатта аниқ мақсадлар, вазифалар бор. Уларга эришиш учун эса тушунтириш, тарғибот ишларини кенг кўламда амалга ошириш керак. Шу боис корхонада вилоятдаги шаҳар-туманлардан келган масъул идоралар вакиллари ҳамда фермерлар иштирокида тақдимот бўлиб ўтди. Унда сув тежовчи технологияларнинг афзалликлари, шу усулда фаолият кўрсатаётган фермерлар тажрибаси ҳақида атрофлича маълумотлар берилди.

Фарғона вилояти ҳокимлиги Ахборот хизмати

2020-09-12 18:11:29